

四庫全書

集部

欽定四庫全書

御定全唐詩卷七百三十九

李建勲

李建勲字致堯隴西人少好學能屬文尤工詩南唐主
李昇鎮金陵用爲副使預禪代之策拜中書侍郎同平
章事昇元五年放還私第嗣主璟召拜司空尋以司徒
致仕賜號鍾山公集二十卷今編詩一卷

中酒寄劉行軍

甚矣頻頻醉神昏體亦虛肺傷徒問藥髮落不盈梳戀
寢嫌明室修生媿道書西峯老僧語相勸合何如

白雁

東溪一白鴈毛羽何皎潔薄暮浴清波斜陽共明滅差
池失羣久幽獨依人切旅食賴菰蒲單棲怯霜雪邊風
昨夜起顧影空哀咽不及牆上烏相將繞雙闕

早春寄懷

家山歸未得又是看春過老覺光陰速閑悲世路多風

和吹岸柳雪盡見庭莎欲向東溪醉狂眠一放歌

春日東山正

一作草

堂作

身閒贏得出天氣漸暄和蜀馬登山穩南朝古寺多早
花微弄色新酒欲生波從此唯行樂閑愁奈我何

春日小園晨看兼招同舍

最有杏花繁枝枝若手搏須知一春促莫厭百迴看鳥
嘯風潛息蜂遲露未乾可容排飲否兼折贈頭冠

惜花寄孫負外

一本缺
孫字

朝始一枝開暮復一枝落只恐雨淋漓又見春蕭索侵
晨結駟携酒徒尋芳踏盡長安衢思量少壯不自樂他
日白頭空歎吁

春日病中

纔得歸閒去還教病卧頻無由全勝意終是負青春綠
柳漸拂地黃鶯如喚人方為醫者勸斷酒已經旬

毆妓

自為專房甚忽忽有所傷當時心已悔徹夜手猶香恨

枕堆雲髻啼襟搵月黃起來猶忍惡剪破繡鴛鴦

踏青樽前

期君速行樂不要旋還家
永日雖無雨東風自落花
詩毫黏酒淡歌袖向人斜
薄暮忘歸路垂楊噪亂鴉

正月晦日

莫倦尋春去都無百日遊
更堪正月過已是一分休
泉暖聲纔出雲寒勢未收
晚來重作雪翻為杏花愁

惜花

白髮今如此紅芳莫更催
預愁多日謝翻怕十分開
點滴無時雨荒涼滿地苔
閑階一柸酒惟待故人來

金谷園落花

一本缺
谷字

愁見清明後紛紛蓋地紅
惜看難過日自落不因風
蝶散餘香在鶯啼半樹空
堪悲一尊酒從此似西東

柳花寄宋明府

一作
寄人

每愛江城裏青春向盡時
一迴新雨歇是處好風吹
破石黏蟲網高樓撲酒旗
遙知陶令宅五樹正離披

送人

相見未逾月堪悲遠別離
非君誰顧我萬里又南之
雨逼清明日花陰杜宇時
愁看挂帆處鷗鳥共遲遲

閒遊

攜酒復攜觴朝朝一似忙
馬諳頻到路僧借舊眠床
道勝他圖薄身閑白日長
扁舟動歸思高處見滄浪

柏梁隔句韻詩

第三句
缺一字

不喜長亭柳枝枝擬送君
惟憐北窗闌樹樹解留人
圓

缺都如月東西只似雲愁看離席散歸蓋動行塵

贈趙學士

常欽趙夫子遠作五侯賓見面到今日操心如古人醉
同華席少吟訪野僧頻寂寂長河畔荒齋與廟隣

春陰

老雨不肯休東風勢還作未放草蒙茸已遣花蕭索浮
生何苦勞觸事妨行樂寄語達生人須知酒勝藥

春日金谷園

一本缺
谷字

火急召親賓歡遊莫厭頻日長徒似歲花過即非春晚
雨來何定東風自不勻須知三箇月不是負芳晨

夏日酬祥松二公見訪

多謝空門客時時出草堂從容非有約淡薄不相忘池
映春篁老簷垂夏果香西峰正清霽自與拂吟床

懷贈操禪師

嘗憶曹溪子龕居面碧嵩杉松新夏後雨雹夜禪中道
匪因經悟心能向物空秋來得音信又在剡山東

閑居秋思呈祥松二公

秋光雖即好客思轉悠哉去國身將老流年雁又來
葉紅堆晚徑菊冷藉空壘不得師相訪難將道自開

賦得冬日青溪草堂四十字

莫道無幽致常來到日西地雖當北闕天與設東溪
疎葦寒多折驚鳬去不齊坐中皆作者長愛覓分題

溪齋

水木遠吾廬塞簾晚檻虛衰條寒露鵲幽果落驚魚愛

酒貧還甚趁時老更踈
車慵自有素不是忽簪裾

留題愛敬寺

野性竟未改何以居朝廷
空為百官首但愛千峰青
南風新雨後與客携觴行
斜陽惜歸去萬壑啼鳥聲

小園

小園吾所好栽植忘勞形
晚果經秋赤寒蔬近社青
竹蘿荒引蔓土井淺生萍
更欲從人勸憑高置草亭

宿山房

石窗燈欲盡松檻月還明就枕渾無睡披衣却出行
巖高泉亂滴林動鳥時驚倏忽山鐘曙喧喧僕馬聲

金陵所居青溪草堂閑興

窗外皆連水杉松欲作林自憐趨競地獨有愛閑心
素壁題看遍危冠醉不簪江僧暮相訪簾卷見秋岑

闕下偶書寄孫員外

長安驅馳地貴賤共悠悠白日誰相促勞生自不休
鳳翔雙闕曉蟬噪六街秋獨有南宮客時來話釣舟

寄魏郎中

碌碌但隨羣萬蘭任不分未嘗矜有道求遇向吾君
迢
駕秋尋寺長歌醉望雲高齋紙屏古塵暗北山文

病中書懷寄王二十六

落葉滿山州閑眠病未瘳窗陰連竹枕藥氣染茶甌
路
匪人遮去官須自一本缺覓休焉宜更羸老扶杖作公侯

採菊

簇簇竟相鮮一枝開幾番味甘資麴蘖香好勝蘭蓀古

道風搖遠荒籬露壓繁盈筐時採得服餌近知門

送王郎中之官吉水

南望廬陵郡山連五嶺長
吾君憐遠俗從事輟名郎
移戶多無土春蠶不滿筐
惟應勞贊畫溪峒况彊梁

孤雁

欲食不敢食合栖猶未栖
聞風亦驚過避繳恨飛低
水澗緣湘困雲寒過磧迷
悲鳴感人意不缺一本見夜烏啼

贈送致仕郎中

鶴立瘦稜稜髭長白似銀衣冠皆古製氣貌異常人聽
雪添詩思看山滯酒巡西峰重歸路惟許野僧親

宿友人山居寄司徒相公

雨雪正霏霏令人不憶歸地爐僧坐煖山枿火聲肥隔
紙烘茶蘂移鐫剝芋衣知君在霄漢此興得還稀

郢客相尋夜荒庭雪灑窩

一作蒿

虛堂看向曙吟坐共忘

勞溪凍聲全滅燈寒焰不高他人莫相笑未易會吾曹

感故府二首

戚戚復戚戚期懷安可釋百年金石心中路生死隔新
墳應草合舊地空苔色白日燈熒熒凝塵滿几席

悵悵復悵悵思君安可及永日在堦前披衣隨風立高
樓暮角斷遠樹寒鴉集惆悵幾行書遺蹤墨猶濕

田家三首

一首第七
句缺一字

畢歲知無事兵銷復舊丁竹門桑徑狹春日稻畦青犬
吠隈籬落雞飛上碓程歸田起闕思蛙蚪草冥冥

不識城中路熙熙樂一作自
一本缺有年木槩擊社酒瓦鼓送

神錢霜落牛歸屋禾收雀滿田遙波過秋水閑閣釣魚
船

長愛田家事時時欲一過垣籬皆樹槿廳院亦堆禾病
果因風落寒蔬向日多遙聞數聲笛牛晚下前坡

新竹

娟娟薰風軟娟娟湛露光參差仙子仗迤邐羽林槍迴
去侵花地斜來破蘚牆籜乾猶抱翠粉膩若塗裝逕曲
莖難數陰疎葉未長嬾嫌吟客倚甘畏夏蟲傷映水如

爭立當軒自著行北亭尊酒興還爲此君狂

歸燕詞

羽翼勢雖微雲霄亦可期飛翻自有路鴻鵠莫相嗤待
侶臨書幌尋泥傍藻池衝人穿柳徑捕蝶遶花枝廣廈
來應徧深宮去不疑雕梁聲上下煙浦影參差舊地人
潛換新巢雀謾窺雙雙暮歸處疎雨滿江湄

題魏壇二首

不遇至真傳道要曾看真誥亦何爲舊碑經亂沈荒澗

靈篆因耕出故基蛙黷自喧澆

一作臨一本缺

藥井牛羊閑過

放生池蕭條夕景空壇畔朽檜枝斜綠蔓垂

一尋遺跡到仙鄉雲鶴沈沈思渺茫丹井歲深生草木
芝田春廢卧牛羊雨淋殘晝摧荒壁鼠引飢蛇落壞梁
薄暮欲歸仍佇立菖蒲風起水泱泱

東樓看雪

一上高樓醉復醒日西江雪更冥冥化風吹火全無氣
平望惟松少

一作別一作劣

露青臘內不妨南地少夜長應得

小窗聽因思舊隱匡廬日閑看杉檉掩石局

落花

惜花無計又花殘獨遶芳叢不忍看暖艷動隨鶯翅落
冷香愁雜燕泥乾綠珠倚檻魂初散巫峽歸雲夢又闌
忍把一尊重命樂送春招客亦何歡

春雪

南國春寒朔氣迴霏霏還阻百花開全移暖律何方去
似誤新鶯昨日來平野旋銷難蔽草遠林高綴却遮梅

不知金勒誰家子只待晴明賞帝臺

重戲和春雪寄沈員外

誰道江南要雪難半春猶得倚樓看却遮遲日偷鶯暖
密灑西風借鶴寒散漫不容梨艷去輕明應笑玉華乾
和來瓊什雖無敵且是儂家比興殘

春日尊前示從事

州中紫牘魚鱗密界上軍書竹節稠眼底好花渾似雪
甕頭春酒漫如油東君不爲留遲日清鏡唯知促白頭

最覺此春無氣味不如庭草解忘憂

尊前

官爲將相復何求世路多端早合休
漸老更知春可惜正歡唯怕客難留
雨催草色還依舊晴放花枝始自由
莫厭百壺相勸倒免教無事結閑愁

薔薇二首

萬藥爭開照檻光詩家何物可相方
錦江風撼雲霞碎仙子衣飄黼黻香
裊露早英濃壓架背人狂蔓暗穿牆

綠牋蠻榼旬休日欲召親賓看一場

拂簷拖地對前墀蝶影蜂聲爛縵時萬倍馨香勝玉蘂
一生顏色笑西施忘歸醉客臨高架恃寵佳人索好枝
將並舞腰誰得及惹衣傷手盡從伊

殘牡丹

腸斷題詩如執別芳茵愁更繞闌鋪風飄金蘂看全落
露滴檀英又暫蘓失意婕妤妝漸薄背身妃子病難扶
迴看池館春休也又是迢迢看畫圖

春雨二首

春霖未免妨遊賞，唯到詩家自有情。
花徑不通新草合，蘭舟初動曲池平。
淨綠高樹莓苔色，飢集一作虛廊燕

雀聲。閑憶昔年爲客處，悶留山館阻行行。

蕭蕭春雨密，還疎景象三時固。不如寒入遠林鶯，翅重
暖抽新麥土。膏虛細濛臺榭微，兼日潛漲連漪欲動魚。
唯稱車慵多睡者，掩門中酒覽閑書。

醉中惜花更書與諸從事

公退尋芳已是遲，莫因他事更來稀。
未經旬日唯憂落，算有開時不合歸。
歌檻宴餘風裊裊，閑園吟散雨霏霏。
高樓鼓絕重門閉，長為拋迴恨解衣。

和判官喜雨

去禱山川尚未還，雲雷尋作遠聲寒。
人情便似秋登悅，天色休勞夜起看。
高檻氣濃藏柳一本缺郭小庭流擁沒
花壇須知太守重，墻內心極農夫望處歡。

離闕下日感恩

二年塵冒處中台喜得南歸退不才即路敢期皇子送
出關猶有御書來未知天地恩何報翻對江山思莫開
斜日葦汀凝立處遠波微颺翠如苔

細雨遙懷故人

江雲未散東風暖溟濛正在高樓見細柳綠堤少過人
平蕪隔水時飛燕我有近詩誰與和憶君狂醉愁難破
昨夜南窗不得眠閑堦點滴迴燈坐

春水

萬派爭流雨過時
晚來春靜更逶迤
輕鷗散遶夫差國
遠樹微分夏禹祠
青岼漸平濡柳帶
舊溪應暖負尊絲
風鬟倚櫂誰家子
愁看鴛鴦望所之

蝶

粉蝶翩翩若有期
南園長是到春歸
閒依柳帶參差起
困傍桃花獨自飛
潛被燕驚還散亂
偶因人逐入簾幃
晚來欲雨東風急
迴看池塘影漸稀

中春寫懷寄沈彬員外

省從騎竹學謳吟，便帶光陰役此心。
寓目不能閒一日，閉門長勝得千金。
窗懸夜雨殘燈在，庭掩春風落絮深。
唯有故人同此興，近來何事嬾相尋。

鍾山寺避暑勉二三子

樓臺雖少景何深，滿地青苔勝布金。
松影晚留僧共坐，水聲閒與客同尋。
清涼會擬歸蓮社，沈湎終須棄竹林。
長愛寄吟經案上，石窗秋霽向千岑。

道林寺

雖向鍾峯數寺連就中奇勝出其間不教幽樹妨閑地
別著高窗向遠山蓮沼水從雙澗入客堂僧自九華還
無因得結香燈社空向王門玷玉班

和致仕沈郎中

欲謀休退尚因循且向東溪種白蘋謬應星辰居四輔
終期冠褐作閑人城中隔日趨朝嬾楚外千峯入夢頻
殘照晚庭沈醉醒靜吟斜倚老松身

醉中詠梅花

十月清霜尚未寒雪英重疊已如搏還悲獨詠東園裏
老作南州刺史看北客見皆驚節氣郡僚癡一作
疑欲望
盃盤交親罕至長安遠一醉如泥豈自歡

閑出書懷

閑遊何用問東西寓興皆非有所期斷酒只攜僧共去
看山從聽馬行遲溪田雨漲禾生耳原野鶯啼黍一本
缺
熟時應有交親長笑我獨輕人事鬢將衰

寺居陸處士相訪感懷却寄二三友人

湘寺閑居亦半年就中昨夜好潛然人歸遠岫疎鐘後
雪打高杉古屋前投足正逢他國亂冥心未解祖師禪
爐烟向冷孤燈下唯有寒吟到曙天

春雪

隨風竟日勢漫漫特地繁於故歲看幽榭凍黏花屋重
短簷斜濕燕巢寒閒聽不寐詩魂爽淨喫無厭酒肺乾
莫道便爲桑麥藥亦勝焦涸到春殘

惜花

淡淡西園日又垂一尊何忍負芳枝莫言風雨長相促
直是晴明得幾時心破只愁鶯踐落眼穿唯怕客來遲
年年使我成狂叟腸斷紅牋幾首詩

梅花寄所親

一氣才新物未知每慙青律與先吹雪霜迷素猶嫌早
桃杏雖紅且後時雲鬢自黏飄處粉玉鞭誰指出牆枝
老夫多病無風味只向尊前詠舊詩

登昇元閣

登高始覺太虛寬
白雪須知唱和難
雲渡瑣窗金榜濕
月移珠箔水精寒
九天星象簾前見
六代城池直下觀
唯有上層人未到
金烏飛過拂闌干

雪有作

霏霏奕奕滿寒空
況是難逢值臘中
未白已堪張宴會
漸繁偏好去簾櫳
庭莎易集看盈地
池柳難裝旋逐風
長愛清華入詩句
預愁遲日放消融

宮詞

自遠凝旒守上陽
舞衣頓減舊朝香
簾垂粉閣春將盡
門掩梨花日漸長
草色深濃封輦路
水聲低咽轉宮牆
君王一去不迴駕
皓齒青蛾空斷腸

晚春送牡丹

攜觴邀客繞朱闌
腸斷殘春送牡丹
風雨數來留不得
離披將謝忍重看
氛氲蘭麝香初減
零落雲霞色漸乾
借問少年能幾許
不須推酒厭枵盤

歲暮晚泊望廬山
不見因懷岳僧呈察判

貪程只為看廬阜及到停舟恨頗濃雲暗半空藏萬仞
雪迷雙瀑在中峯林端莫辨曾遊路鳥際微聞向暮鐘
長愧昔年招我入共尋香社見芙蓉

重臺蓮

斜倚秋風絕比倫千英和露染難勻自為祥瑞生南國
誰把丹青寄北人明月幾宵同綠水牡丹無路出紅塵
憐伊不算多時立贏得馨香暗上身

迎神

搗蠻鼉吟塞笛女巫結束分行立空中再拜神且來滿
奠椒漿齊獻揖陰風窸窸吹紙錢妖巫瞑目傳神言與
君降福為豐年莫教賽祀虧常筵

春詞

日高閒步下堂階細草春莎沒繡鞋折得玫瑰花一朵
憑君簪向鳳皇釵

獨夜

佳人一去無消息夢覺香殘愁復入空庭悄悄月如霜

獨倚闌干伴花立

竹

瓊節高吹宿鳳枝
風流交我立忘歸
最憐瑟瑟斜陽下
花影相和滿客衣

清明日

他皆攜酒尋芳去
我獨關門好靜眠
唯有楊花似相覓
因風時復到牀前

宮詞

宮門長閉舞衣閑
略識君王鬢便斑
却羨落花春不管
御溝流得到人間

送喻鍊師歸茅山

休糧知幾載
臉色似桃紅
半醉離城去
單衣行雪中
水聲茅洞曉
雲影石房空
莫學秦時客
音書便不通

和元宗元日大雪登樓

紛紛忽降當元會
著物輕明似月華
狂灑玉墀初散絮
密黏宮樹未妨花
迴封雙闕千尋峭
冷壓南山萬仞斜

寧意傳來中使出御題先賜老僧家

遊棲霞寺

養花天氣近平分瘦馬來敲白下門曉色未開山意遠
春容猶淡月華昏琅琊冷落存遺跡籬舍稀疏帶舊村
此地幾經人聚散只今王謝獨名存

答湯悅

司空猶不作那敢作司徒幸有山翁號如何不見呼

金山

不嗟白髮曾遊此不歎征帆無了期
盡日憑闌誰會我只悲不見韓垂詩

送李冠

冠善吹
中管

勻如春澗長流水怨似秋枝欲斷蟬
可惜人間容易聽清聲不到御樓前

遊宋興寺東巖

幾年不到東巖下舊住僧亡屋亦無
寒日蕭條何物在朽松經燒石池枯

批周宗書後

建勲鎮臨川九江帥周宗初蒞任以書借器用儀注因批其後

偶罷阿衡來典郡固無閑物可應官憑君爲報羣胥道

莫作循州刺史看

牛僧孺謫循州長史

題信果觀壁

春來漲水流而活曉色西山勢似行玉洞主人經却在
攜竿步步就長生

送八分書與友人繼以詩

跂跂爲詩跂跂書不封將去寄仙都仙翁拍手應相笑

得似秦朝次仲無

句

桃花流水須長信不學劉郎去又來

見南唐近事

粟多未

必全爲計師老須防有伏兵

寄馮延魯使閩

徧尋雲壑重題

石欲下山門更倚松

留別鍾山見吟窗雜錄

欽定四庫全書

御定全唐詩卷七百四十

孟賓于

孟賓于字國儀連州人天福九年登第還鄉爲馬氏從事後歸南唐爲塗陽令坐繫赦歸後主起爲水部員外致仕初居吉州玉笥山自號羣玉峰叟有金鰲集二卷今存詩八首

蟠溪懷古

良哉呂尚父深隱始歸周釣石千年在春風一水流松
根盤蘚石花影卧沙鷗誰更懷韜術追思古渡頭

懷連上舊居

閑思連上景難齊樹繞仙鄉路繞溪明月夜舟漁父唱
春風平野鷓鴣啼城邊寄信歸雲外花下傾杯到日西
更憶海陽垂釣侶昔年相遇草萋萋

公子行

錦衣紅奪彩霞明侵曉春遊向野庭不識農夫辛苦力

驕驄蹋爛麥青青

湘江亭

獨宿大中年裏寺
樊籠得出事無心
寒山夢覺一聲磬
霜葉滿林秋正深

題梅仙館

仙界路遙雲縹緲
古壇風冷葉蕭騷
後來豈合言淹滯
一尉昇騰道最高

題顏氏亭宇

南唐書顏詡居木川雅詞翰所居
依泉石築亭榭開軒四敞碧蘚叢

繞翠微環列蕭爽之趣杜絕塵囂
名士賓于輩各爲詩以述其幽隱

園林蕭灑聞來久欲訪因循二十秋
今日開襟吟不盡
碧山重疊水長流

晚眺

倚杖殘秋裏吟中四顧頻
西風天際雁落日渡頭人
草色衰平野山陰斂暮塵
却尋苔徑去明月照村鄰

獻主司

那堪雨後更聞蟬
溪隔重湖路七千
憶昔故園楊柳岸

全家送上渡頭船

主司得詩自謂得賓于之晚後賓于致仕歸連上過廬陵吉守贈詩有今

日還家莫惆悵不同初上渡頭船用此

句

遠樹連沙靜閒舟入浦遲

夏日曲江

簾垂羣吏散苔長訟

庭閒

贈徐明府並詩中旨格

去年曾折處今日又垂條

柳下吟窗以

雜錄

早知落處隨疎雨悔得開時順暖風

花落

千家簾

幕春空在幾處樓臺月自明

花落

臘雪化爲流水去春

風吹出好山來

雪霽

昔日聲塵喧洛下近年詩句滿江

南

寄李昉

匝地人家凭檻見，遠山秋色捲簾看。

永州法華寺高

軒詩
話總龜

蟾宮空手下，澤國更誰來。水國二親應探

榜，龍門三月又傷春。

仙鳥却回空說夢，清朝未達自

嫌身。失意從他桃李春，嵩陽經過歇行塵。雲僧不見

城中事，問是今年第幾人。因逢日者教重應，忍被雲

僧勸却歸。

賓于應舉卜於華山神一年乞一政凡六擲而得吉兆後果驗每年下第有詩 郡閣雅

談

廖匡圖

廖匡圖字贊禹虔州人湖南馬氏辟幕下爲天策府學士與劉昭禹李宏臯徐仲雅蔡昆韋鼎釋虛中齊己俱以文藻知名詩四首

九日陪董內召登高

祝融峰下逢嘉節相對那能不愴神煙裏共尋幽磳菊樽前俱是異鄉人遙山帶日應連越孤雁來時想別秦自古登高盡惆悵茱萸休笑淚盈巾

贈泉陵上人

暫把枯藤倚碧根
禪堂初創楚江濱
直疑松小難留鶴
未信山低住得雲
草接寺橋牛笛近
日銜村樹鳥行分
每來共憶曾遊處
萬壑泉聲絕頂聞

和人贈沈彬

冥鴻跡在煙霞上
燕雀休誇大廈巢
名利最爲浮世重
古今能有幾人拋
逼真但使心無著
混俗何妨手強抄
深喜卜居連岳色
水邊竹下得論交

松

曾於西晉封中散又向東吳作大夫濃翠自知千古在
清聲誰道四時無枝柯偃後龍蛇老根脚盤來爪距粗
直待素秋搖落日始將凡木鬪榮枯

句

正悲世上事無限細看水中塵更多

永州江
千感興

廖凝

廖凝字熙績圖之弟初歸湖南隱衡岳後與馬希萼同
遷金陵授水部員外郎出爲建昌令終江州團練副使

善吟諷與李建勲爲詩友相善江左學詩者多造其門
集七卷今存詩三首

中秋月

九十日秋色今宵已半分孤光含列宿四面絕纖雲衆
木排踈影寒流疊細紋遙遙望丹桂心緒正紛紛

聞蟬

一聲初應候萬木已西風偏感異鄉客先於離塞鴻日
斜金谷靜雨過石城空此處不堪聽蕭條千古同

彭澤解印

五斗徒勞謾折腰三年兩鬢為誰焦
今朝官滿重歸去還挈來時舊酒瓢

句

滿汀漚不散一局黑全輸

十歲詠棋作者見之曰

郡閣雅談云必無名於後

獵回千帳雪探密大河冰

以下並吟窻雜錄

落盡最高樹始

知松柏青

落葉

飯僧春嶺蕨醒酒雪潭魚

贈史虛白

風清

竹閣留僧宿雨濕莎庭放吏衙

宰彭澤作

紅躑躅繁金殿

暖碧芙蓉笑水宮秋錦繡萬

花谷

韋鼎

韋鼎湖南人與廖匡圖俱知名詩一卷今存一首

贈廖凝

時凝居南岳

君與白雲鄰生涯久忍貧姓名高雅道寰海許何人岳
氣秋來早亭寒果落新幾回吟石畔孤鶴自相親

左偃

左偃南唐人不仕居金陵能詩有鍾山集一卷今存詩

十首

寄廬山白上人

潦倒門前客閒眠歲又殘連天數峰雪終日與誰看萬丈高松古千尋落水寒仍聞有新作嬾寄入長安

寄韓侍郎

謀身謀隱兩無成拙計深慙負耦耕漸老可堪懷故國多愁翻覺厭浮生言詩幸遇明公許守朴甘遭俗者輕今日況聞搜草澤獨悲顛顚卧昇平

漢宮詞

寒燭照清夜笙歌隔繡牆一從飛燕入便不見君王

送君去

關河月未曉行子心已急佳人無一言獨背殘燈泣

秋晚野望

倚筇聊一望何處是秦川草色初晴路鴻聲欲暮天

郊原晚望懷李秘書

歸鳥入平野寒雲在遠村徒令睇望久不復見王孫

言懷別同志

漸老將誰託勞生每自慙何當重攜手風雨滿江南

江上晚泊

寒雲淡淡天無際片帆落處沙鷗起水濶風高日復斜
扁舟獨宿蘆花裏

寄鑒上人

一從攜手阻戈鋌屈指如今已十年長記二林同宿夜
竹齋聽雨共忘眠

送人

一莖兩莖華髮生
千枝萬枝梨花白
春色江南獨未歸
今朝又送還鄉客

句

胡笳聞欲死
漢月望還生

昭君怨

日華離碧海
雲影散

青霄

早日

御定全唐詩卷七百四十

欽定四庫全書

御定全唐詩卷七百四十一

陳貺

陳貺南閩人隱廬山三十年元宗聘至獻景陽臺懷古詩元宗稱善授以官固辭賜粟帛遣還詩一首

景陽臺懷古

景陽六朝地運極自依依一會皆同是到頭誰論非酒
濃沈遠慮花好失前機見此尤宜戒正當家國肥

劉洞

劉洞廬陵人學詩於陳貺隱居廬山後主召見獻詩百篇有集行世存詩一首

石城懷古

石城古岸頭一望思悠悠幾許六朝事不禁江水流

句

千里長江皆渡馬十年養士得何人
翻憶潘郎章奏

內惜惜日暮好沾巾

江南野錄金陵受園洞爲七言詩榜路傍云云家國惜惜如日將暮

潘佑諫表
中語也

百骸同草木萬象入心靈
夜坐
窗雜錄
吟

江爲

江爲宋州人避亂家建陽遊廬山師陳貺爲詩集一卷
今存詩八首

旅懷

迢迢江漢路秋色又堪驚
半夜聞鴻雁多年別弟兄
高風雲影斷微雨菊花明
欲寄東歸信裴回無限情

江行

越信隔年稀孤舟幾夢歸月寒花露重江晚水煙微峰
直帆相望沙空鳥自飛何時洞庭上春雨滿蓑衣

登潤州城

天末江城晚登臨客望迷春潮平島嶼殘雨隔虹霓鳥
與孤帆遠烟和獨樹低鄉山何處是目斷廣陵西

岳陽樓

倚樓高望極展轉念前途晚葉紅殘楚秋江碧入吳雲
中來雁急天末去帆孤明月誰同我悠悠上帝都

送客

明月孤舟遠吟髭鑷更華天形圍澤國秋色露人家水
館螢交影霜洲橘委花何當尋舊隱泉石好生涯

臨刑詩

五代史補爲在福州有故人欲投江南
爲與草表事發并誅臨刑詞色不撓賦

此詩

街鼓侵人急西傾日欲斜黃泉無旅店今夜宿誰家

塞下曲

萬里黃雲凍不飛磧煙烽火夜深微胡兒移帳寒笳絕

雪路時聞探馬歸

隋堤柳

錦纜龍舟萬里來
醉鄉繁盛忽塵埃
空餘兩岸千株柳
雨葉風花作恨媒

句

吟登蕭寺旃檀閣
醉倚王家玳瑁筵
題白鹿寺
遠遠朝宗

出白雲方圓隨處性
長存

水窗雜錄見吟

高越

高越字仲遠幽州人仕吳授秘書郎累遷中書舍人終
勤政殿學士戶部侍郎詩一首

詠鷹

趙歸南唐初投鄂帥張宣
久不見知以鷹詩誚之

雪爪星眸世所稀摩天專待振毛衣虞人莫謾張羅網
未肯平原淺草飛

一作晴空不礙摩天
翻未肯平原淺草飛

御定全唐詩卷七百四十一

欽定四庫全書

御定全唐詩卷七百四十二

張泌

一作
泌

張泌字子澄淮南人仕南唐為句容縣尉累官至內史
舍人詩一卷

惜花

蝶散鶯啼尚數枝日斜風定更離披
看多記得傷心事
金谷樓前委地時

欽定四庫全書

御定全唐詩

卷七百四十二

一

寄人

別夢依依到謝家，小廊迴合曲闌斜。
多情只有春庭月，猶為離人照落花。

酷憐風月為多情，還到春時別恨生。
倚柱尋思倍惆悵，一場春夢不分明。

邊上

戍樓吹角起征鴻，獵獵寒旌背晚風。
千里暮烟愁不盡，一川秋草恨無窮。
山河慘澹關城閉，人物蕭條市井空。

只此旅魂招未得更堪回首夕陽中

長安道中蚤行

客離孤館一燈殘
牢落星河欲曙天
雞唱未沈函谷月
鴈聲新度灞陵烟
浮生已悟莊周蝶
壯志仍輸祖逖鞭
何事悠悠策羸馬
此中辛苦過流年

洞庭阻風

空江浩蕩景蕭然
盡日孤蒲泊釣船
青草浪高三月渡
綠楊花撲一溪煙
情多莫舉傷春目
愁極無無買酒錢

猶有漁人數家住不成村落夕陽邊

春日旅泊桂州

暖

一作曉

風芳草竟芊綿多病多愁負少年弱柳未勝寒

食雨好花爭奈夕陽天溪邊物色堪

一作宜

圖畫林畔鶯

聲似管弦獨有離人開淚眼強憑杯酒亦潸然

晚次

一作歌

湘源縣

煙郭遙聞向晚雞水平舟靜浪聲齊高林帶雨楊梅熟

曲岸籠雲謝豹啼二女廟荒汀

一作宮

樹老九疑山碧楚

天低湘南自古多離怨莫動哀吟易慘悽

惆悵吟

秋風丹葉動荒城慘澹雲遮日半明
晝夢却因惆悵得晚愁多為別離生
江淹彩筆空留恨莊叟元譚未及情
千古怨魂銷不得一江寒浪若為平

秋晚過洞庭

征帆初

一作高

挂酒初酣莫景離情兩不堪千里晚霞雲

夢北一洲霜橘洞庭南溪風送雨過秋寺磴石驚龍落

夜潭莫把羈魂吊湘魄九疑愁絕鎖煙嵐

題華嚴寺木塔

六街晴色動秋光雨霽憑高只易傷一曲晚煙浮渭水
半橋斜日照咸陽休將世路悲塵事莫指雲山認故鄉
回首漢宮樓閣暮數聲鐘鼓自微茫

經舊遊

暫到高唐曉又還丁香結夢水潺潺不知雲雨歸何處
歷歷空留十二山

碧戶

碧戶扃魚鑠蘭窗掩鏡臺落花疑悵望歸燕自襄回詠
絮知難敵傷春不易裁恨從芳草起愁為晚風來衣惹
湘雲薄眉分楚岫開香濃眠舊枕夢好醉春杯小障明
金鳳幽屏點翠苔寶箏橫塞鴈怨笛落江梅卓氏仍多
酒相如正富才莫教琴上意翻作鶴聲哀

芍藥

香清粉澹怨殘春蝶翅蜂鬚戀紫塵閑倚晚風生悵望

靜留遲日學因循休將薜荔為青瑣好與玫瑰作近鄰
零落若教隨暮雨又應愁殺別離人

春晚謠

雨微微煙霏霏小庭半拆紅薔薇鈿箏斜倚畫屏曲零
落幾行金鴈飛蕭關夢斷無尋處萬疊春波起南浦凌
亂楊花撲繡簾晚窗時有流鶯語

所思

空塘水碧春雨微東風散漫楊柳飛依依南浦夢猶在

脉脉高唐雲不歸江頭日暮多芳草極目傷心煙悄悄
隔江紅杏一枝明似玉佳人俯清沼休向春臺更迴望
銷魂自古因惆悵銀河碧海共無情兩處悠悠起風浪

春夕言懷

風透疎簾月滿庭倚欄無事倍傷情煙垂柳帶纖腰軟
露滴花房怨臉明愁逐野雲銷不盡情隨春浪去難平
幽窗謾結相思夢欲化西園蝶未成

春江雨

雨溟溟風泠泠老松瘦竹臨煙汀空江冷落野雲重村

一作雲

中鬼火

一作孤月

微如星夜驚溪上漁人起滴瀝蓬聲

滿愁耳子規叫斷獨未眠
卷岸春濤打船尾

送容州中丞赴鎮

交趾同星坐龍泉佩斗文
燒香翠羽帳看舞鬱金裙
鷁首衝瀧浪犀渠拂嶺雲
莫教銅柱北祇說馬將軍

贈韓道士

日暮秋風吹野花上清歸客意無涯
桃源寂寂煙霞閉

天路悠悠星漢斜還似世人生白髮定知仙骨變黃芽
東城南陌頻相見應是壺中別有家

御定全唐詩卷七百四十二

欽定四庫全書

御定全唐詩卷七百四十三

孫魴

孫魴字伯魚南昌人從鄭谷爲詩頗得鄭體事吳爲宗
正郎與沈彬李建勲友善集三卷今存詩七首

甘露寺

寒暄皆有景孤絕畫難形地拱千尋嶮天垂四面青
燈籠鴈塔夜磬徹漁汀最愛僧房好波光滿戶庭

題金山寺

萬古波心寺金山名目新天多剝得月地少不生塵過

榜妨僧定驚濤濺佛身誰言張處士題後更無人

前四句一

作山載江心寺魚龍是四鄰樓臺懸倒影鐘磬隔罽塵末二句一作誰言題詠處流響更無人

楊柳枝詞五首

靈和風暖太昌春舞線搖絲向昔人何似曉來江雨後
一行如畫隔遙津

彭澤初栽五樹時只應閑看一枝垂不知天意風流處

要與佳人學畫眉

暖傍離亭靜拂橋
入流穿檻綠陰搖
不知落日誰相送
魂斷千條與萬條

春來綠樹遍天涯
未見垂楊未可誇
晴日萬株煙一陣
閒坊兼是莫愁家

十首當年有舊詞
唱青歌翠幾無遺
未曾得向行人道
不為離情莫折伊

句

遊子未歸去野花愁破心

春日途中吟窗雜錄

劃多灰漸冷坐

久席成痕

江南野錄

結宇孤峰上安禪巨浪閒

分開朝

海浪留住過江雲

以上並金山寺

劃多灰雜蒼虬跡坐久煙

消寶鴨香

夜坐

沈彬

沈彬字子文高安人唐末應進士不第浪跡湖湘嘗與僧虛中齊已爲詩友事吳爲秘書郎以吏部郎中致仕年八十餘李璟以舊恩召見賜粟帛官其子詩十九首

入塞二首

欲爲皇王服遠戎萬人金甲鼓聲中陣雲黯塞三邊黑
兵血愁天一片紅半夜翻營旗攬月深秋防戍劒磨風
謗書未及明君熱卧骨將軍已殁功

苦戰沙門卧箭痕

一作年少解鄉事冠軍

戍樓閑上望星文生希

國澤分偏將

一作生布沙漢擒驕虜

死奪河源荅聖君鳶覩敗兵

眠白

一作血

草馬驚邊

一作冤

鬼哭陰

一作愁

雲功多地遠無

人紀漢閣笙歌日又曛

塞下三首

塞葉聲悲秋欲霜
寒山數點下牛羊
映霞旅鴈隨疎雨
向磧行人帶夕陽
邊騎不來沙路失
國恩深後海城荒
胡兒向化新成長
猶自千回問漢王

貴主和親殺氣沉
燕山閑獵鼓鼙音
旗分雪草偷邊馬
箭入寒雲落塞禽
隴月盡牽鄉思
動戰衣誰寄淚痕深
金釵謾作封侯別
劈破佳人萬里心

月冷榆關過鴈行
將軍寒笛老思鄉
貳師骨恨千夫壯

李廣魂飛一劍長
戍角就沙催落日
陰雲分磧護飛霜
誰知漢武輕中國
開奪天山草木荒

秋日

秋含砧杵擣斜陽
笛引西風顥氣涼
薜荔惹煙籠蟋蟀
芰荷翻雨潑鴛鴦
當年酒賤何妨醉
今日時難不易狂
腸斷舊遊從一別
潘安惆悵滿頭霜

金陵雜題二首

王氣生秦四百年
晉元東渡浪花船
正慙海內皆塗地

來保江南一片天古樹著行臨遠岸暮山相亞出微煙
千征萬戰英雄盡落日牛羊食野田

暮潮聲落草光沉賈客來帆宿岸陰一笛月明何處酒
滿城秋色幾家砧時清曾惡桓溫盛山翠長牽謝傅心
今日到來何物在碧煙和雨鎖寒林

麻姑山

紺殿松蘿太古山仙人曾此話桑田閑傾雲液十分日
已過浮生一萬年花洞路中逢鶴信水簾巖底見龍眠

我來遊禮酬心願欲共怡神契自然

題蘇仙山

郴州城東有山為蘇耽修真之所名蘇仙山

眼穿林罅見郴州井里交連側局楸味道不來閑處坐
勞生更欲幾時休蘓仙宅古煙霞老義帝墳荒草木愁
千古是非無處問夕陽西去水東流

洪州解至長安初舉納省卷夢仙謠

缺二十八字

玉殿大開從客入

金桃爛熟没人偷鳳驚寶扇頻翻翅龍懼

一作悞

金鞭不

一作
忽轉頭

憶仙謠 第二舉

白榆風颭九天秋。王母朝迴宴玉樓。日月漸長雙鳳睡。
桑田欲變六鰲愁。雲翻簫管相隨去。星觸旌幢各自流。
詩酒近來狂不得。騎龍却憶上清遊。

納省卷贈爲首劉象 第三舉

曾應大中天子舉。四朝風月鬢蕭疎。不隨世祖重攜劍。
却爲文皇再讀書。十載戰塵銷舊業。滿城春雨壞貧居。

一枝何事於君借仙桂年年幸有餘

文皇謂太宗世祖謂昭宗以光武中

興比之也

贈王定保

定保光化中及第吳子華侍郎以子妻之子華即世定保南遊湖湘無北

歸意吳女假縞服自長安來謁白於馬殷令引見於佛寺吳隔簾謂之

仙桂曾攀第一枝薄遊湘水阻佳期皋橋已失齊眉願

蕭寺行逢落髮師廢苑露寒蘭寂寞丹山雲斷鳳參差

聞公已有平生約謝絕女蘿依兔絲

結客少年場行

重義輕生一劍知
白虹貫日報讐歸
片心惆悵清平世
酒市無人問布衣

陽朔碧蓮峰

陶潛彭澤五株柳
潘岳河陽一縣花
兩處爭如陽朔好
縣一作碧蓮峰裏住人家

再過金陵

玉樹歌終王氣收
鴈行高送石城秋
江山不管興亡事
一任斜陽伴客愁

都門送別

岸柳蕭疎野荻秋
都門行客莫回頭
一條灞水清如劍
不爲離人割斷愁

弔邊人

殺聲沈後野風悲
漢月高時望不歸
白骨已枯沙上草
家人猶自寄寒衣

句

尺素隱清輝一毫分險阻

題畫山水圖

金翅動身摩日月

銀河轉浪洗乾坤

獻馬殷頌德
五代史補

須知手筆安排定不

怕山河整頓難

獻李昇山
水圖詩

九衢冠蓋暗爭路四海干

戈多異心

紀事

地隈一水巡城轉天約羣山附郭來

題法

華寺零陵總記

數家魚網疎雲外一岸殘陽細雨中

湘江行

松敲晚影離壇草鐘撼秋聲入殿風

潘天錫同題古
觀郡閣雅談

壓低吳楚遙涵水約破雲霞獨倚天

望廬山
野客叢談

半身

落日離秦樹一路平蕪入楚煙

以下錦繡
萬花谷

清占月中

三峽水麗偷雲外十洲春

幽鳥喚人穿竹去野猿尋

果出雲來

御定全唐詩卷七百四十三

欽定四庫全書

御定全唐詩卷七百四十四

伍喬

伍喬廬江人南唐時舉進士第一仕至考功員外郎詩一卷

僻居謝何明府見訪

公退琴堂動逸懷
閑披煙靄訪微才
馬嘶窮巷蛙聲息
轍到衡門草色開
風引柳花當坐起
日將林影入庭來

滿齋塵土一牀蘚多謝從容水飯回

冬日道中

一作冬日送人

去去天涯無定期瘦童羸馬共依依暮煙江口客來絕

寒葉嶺頭

一作前

人住

一作往

稀帶雪野風吹旅思入雲山

火照行衣釣臺吟閣滄洲在應爲初心未得歸

僻居酬友人

僻居雖

一作惟

愛近林泉幽徑閑居

一作園

碧

一作任

蘚連向

竹掩扉隨鶴息就溪安石學僧禪古琴帶月音聲亮

一作

正山果經霜氣味全多謝故交憐朴野隔雲時復寄佳篇

遊西山龍泉禪寺

一作院

疊巘層峰坐可觀枕門流水更潺湲

一作出雲端

曉鐘聲徹

洞溪遠夏木影籠軒檻寒幽徑乍尋衣屨潤古堂頻宿夢魂安因嗟城郭營營事不得長遊

一作遊茲

空鬢殘

宿瀟山

一入仙山萬慮寬夜深寧厭倚虛欄鶴和雲影宿高木

人帶月光登古壇
芝朮露濃溪塢白
薜蘿風起殿廊寒
更陪羽客論真理
不覺初鐘叩曉殘

遊西禪

遠岫當軒列翠光
高僧一衲萬緣忘
碧松影裏地長潤
白藕花中水亦香
雲自雨前生淨石
鶴于鐘後宿長一
作塵廊遊人戀此吟
終日盛暑樓臺早有涼

寄史處士

長羨閑居一水湄
吟情高古有誰知
石樓待月橫琴久

漁浦經風下釣蓬

一作幽園

落花多掩徑舊山殘燒幾

侵籬松門別後無消息早晚重應躡屐隨

一作重爲清話期

僻居秋思寄友人

一作故友

門巷秋歸更寂寥雨餘閑砌委蘭苗夢迴月夜蟲吟壁
病起茅齋藥滿瓢澤國舊遊關遠思竹林前會負佳招
身名未立猶辛苦何許流年晚鬢凋

一作焦

寄落星史虛白處士

白雲峰下古溪頭曾與提壺爛漫遊登閣共看彭蠡水

圍爐相憶杜陵秋
綦元不厭通高品

一作通宵算

句妙多容

隔歲酬別後相思時
一望暮山空碧水空流

九江旅夜寄山中故人

弱柳風高遠漏沈
坐來難便息愁吟
江城雪盡寒猶在
客舍燈孤夜正深
塵土積年粘旅服
關山無處寄歸心

此時遙羨閒眠侶
靜掩雲扉卧

一作向

一林

聞杜牧赴闕

舊隱匡廬一草堂
今聞攜策謁吾皇
峽雲難卷從龍勢

古劍終騰出土光開翅定期歸碧落濯纓寧肯問滄浪
他時得意交知仰莫忘裁詩寄釣鄉

題西林寺水閣

竹翠苔花遶檻濃此亭幽致詎曾逢水分林下清泠派
山峙雲間峭峻峰怪石夜光寒射燭老杉秋韻冷和鐘
不知來往留題客誰約重尋蓮社蹤

林居喜崔三博遠至

幾日區區在遠程晚煙林徑喜相迎姿容雖有塵中色

巾屨猶多嶽上清
野石靜排爲坐榻
溪茶深煮當飛觥
留連話與方經宿
又欲攜書別我行

觀華夷圖

別手應難及此精
須知攢簇自心靈
始於毫末分諸國
漸見圖中列四溟
關路欲伸通楚勢
蜀山俄聳入秦青
筆端盡現寰區事
堪把長懸在戶庭

廬山書堂送祝秀才還鄉

束書辭我下重巔
相送同臨楚岫邊
歸思幾隨千里水

離情空寄一枝蟬園林到日酒初熟庭戶開時月正圓
莫使蹉跎戀踈野男兒酬志在當年

暮冬送何秀才毘陵

足馬嘶風去思長素琴孤劍稱戎裝路塗多是過殘歲
杯酒無辭到醉鄉雲傍水村凝冷片雪連山驛積寒光
毘陵城下饒嘉景回日新詩應滿堂

龍潭張道者

碧洞幽巖獨息心時人何路得相尋養生不說憑諸藥

適意惟聞在一琴石徑掃稀山蘚合竹軒開晚野雲深
他年功就期飛去應笑吾徒多苦吟

晚秋同何秀才溪上

閒步秋光思杳然荷藜因共過林煙期收野藥尋幽路
欲採溪菱上小船雲吐晚陰藏霽岫柳含餘靄咽殘蟬
倒尊盡日忘歸處山磬數聲敲暝天

送江少府授延陵後寄

五老雲中勤學者遇時能不困風塵東書西上謁明主

捧檄南歸慰老親別館友朋留醉久去程煙月入吟新
莫因官小慵之任自古鸞樓有異人

觀山水障子

功績精妍世少倫圖時應倍用心神不知草木承何異
但見江山長帶春雲勢似離巖底石浪花如動岼邊蘋
更疑獨泛漁舟者便是其中舊隱人

寄張學士洎

不知何處好消憂公退攜壺即上樓職事久參侯伯幕

夢魂長遠帝王州
黃山向晚盈軒翠
點水含春繞檻流
遙想玉堂多暇日
花時誰伴出城遊

句

積靄沈諸壑
微陽在半峰

省試霽後
望鍾山



御定全唐詩卷七百四十四

欽定四庫全書

集部

御定全唐詩卷七百四十五

詳校官庶吉士臣胡鈺

主事銜臣徐以坤覆勘

總校官知縣臣繆琪

校對官中書臣高 中

謄錄監生臣范宜勳

欽定四庫全書

御定全唐詩卷七百四十五

陳陶

陳陶字嵩伯嶺南

一云鄱陽人
一云劍浦

大中時遊學長安南唐

昇元中隱洪州西山後不知所終詩十卷今編爲二卷

塞下曲

邊頭能走馬
援臂李將軍
射虎羣胡伏
開弓絕塞聞
海山諳向背
攻守別風雲
只爲坑降罪
輕車未轉勲

望湖關下戰雜虜喪全師鳥啄豺狼將沙埋日月旗牛
羊奔赤狄部落散燕耆都護凌晨一作臨城出銘功瘞死屍

胡無人行

十萬羽林兒臨洮破郅支殺添胡地骨降足漢營旗塞
闊牛羊散兵休帳幕移空流隴頭水嗚咽向人悲

悲哉行

中嶽仇先生遺余餌松方服之一千日肢體生異香步
履如風旋天涯不齎糧仍云一作聞爲地仙不得朝虛皇

狡兔有三穴人生又何常悲哉二廉士餓死於首陽

塗山懷古

落拓書劍晚清秋鷹正籠塗山間來上敬愛如登龍覽

古覺神王脩然天地空東南更一作竟何有一醉先王風

惟昔放勳世陰晦徹一作膚成洪皇圖化魚鱉天道漂無

蹤帝乃命舟楫擬芳儒素中高陳九州力百道驅歸東

舊物復光明洪爐再埏鎔經門不私子足一作示天下

公亮曰那並生唐虞禪華蟲茲山朝萬國一賦寰海同

十載有區寓秋毫皆

一作亦

帝功垂衣不驕德子桀如何

聾握髮間禮賢葺茅見早宮凡夫色難事神聖安能恭

道隱

一作德

三千年遺芳播笙鏞當時執圭處佳氣仍童

童海嶼儼清廟天人盛祇供元恩及花木丹識名崆峒

異代草澤臣何由樹勲庸堯階未曾識誰信平生忠恨
不當際會預爲執鞭僮勞歌下山去懷德心無窮

遊子吟

栖烏喜林曙驚蓬傷歲闌關河三尺雪何處是天山朔

風無重衣僕馬飢且寒慘憾別妻子遲回出門難男兒
值休明豈是長泥蟠何者爲木偶何人侍金鑾鬱鬱守
貧賤悠悠亦無端進不圖功名退不處巖巖窮通在何
日光景如跳丸富貴苦不早令人摧心肝誓期春之陽
一振摩霄翰

懷仙吟二首

丹陵五牙

一作霞

客昨日羅浮歸赤斧尋不得煙霞空滿

衣試於華陽問果遇三茅知採藥向十洲同行牧羊兒

十洲隔八海浩渺不可期空留雙白鶴巢在長松枝
雲溪古流水春晚桃花香憶與我師別片帆歸滄浪滄
浪在何許相思淚如雨黃鶴不復來雲深離別處石渠
泉泠泠三見菖蒲生日夜勞夢魂隨波注東溟空懷別
時惠長讀消魔經

海昌望月

何處無今夕豈期在海頭賈客不愛月嬋娟閑

一作避一作入

滄洲浩然傷歲華獨望湖邊樓煙島青歷歷藍田白悠

悠誰無破鏡期繫我信虛舟誰無桂枝念繫我方摧輶

始見彎環春又逢團圓秋莫厭綾扇夕百年多銀鈎金

盤誰雕鐫玉窟難冥搜重輪運時節三五不自由疑拋

雲上鍋

一作
碣

欲樓天邊毬嬭居應寒冷擣藥青冥愁兔

子樹下蹲蝦蟇池中遊如何名金波不共水東流天花

辟臙腥野雲無邊陬蚌蛤乘大運含珠相對醅夜鵲思

南鄉露華清東甌百寶安可覩老龍鑱深湫究究如情

人盜者即

一作
如

仇讐海涯上皎潔九門更清幽亭亭勸

金尊夜久喘吳牛夷俗皆輕擲北山思今

一作遊

遊鴈聲

故鄉來客淚墮南洲平生煙霞志讀書覓封侯四海尚
白身豈無故鄉羞壞坎何足歎壯如水中虬獵獵谷底
蘭搖搖波上鷗中途喪資斧兩地生繁憂一杯太陰君
鷓鴣豈無求明日將片葉三山東南浮

蒲門戍觀海作

廓落溟漲曉蒲門鬱蒼蒼登樓禮東君旭日生扶桑毫
釐見蓬瀛含

一作吞

吐金銀光草木露未晞蜃樓氣若藏

欲遊蟠桃園慮涉魑魅鄉徐市惑秦朝何人在巖廊惜
哉千童子葬骨於眇茫恭聞槎客言東池接天潢即此
聘牛女曰祈長壽方靈津水清一作深淺余亦慕脩航

番禺道中作

博羅程遠近海塞愁先入瘴雨出虹蜺蠻江渡山急常
聞島夷俗犀象滿城邑鴈至草猶春潮迴檣半濕丹邱
鳳皇隱水廟蛟龍集何處樹能言幾鄉珠是泣千年趙
佗國霸氣委原隰齷齪笑終軍長纓禍先及

贈江西周大夫

一作贈周太史

否極生大賢，九元降靈氣。獨立正始風，蔚然中興瑞。淵
淪照三古，磊落涵涇渭。真貌月懸秋，雄詞雷出地。具瞻
先皇寵，欲踐東華貴。咫尺時不來，千秋鼎湖淚。因分三
輔職，進領南平位。報政黃霸慙，提兵呂蒙醉。歲星臨斗
牛，水國嘉祥至。不獨蒼生蘓，仍兼六駟喜。一作恭聞廟
堂畧欲斷匈奴，臂剡釋自宸衷。平戎在連帥，時康簪笏
冗。世梗忠良議，邱壑非無人。松香有私志，三朝倚天劍。

十萬浮雲騎可使河曲清羣公信兒戲滄溟用謙德百
谷走童稚禦衆付深人參籌須偉器他年蓬蒿賤願附
鵷鸞翅

旅次銅山途中先寄温州韓使君

亂山滄海曲中有橫陽道東馬過銅梁茗華坐堪老鳩
鳴高崖裂熊鬬深樹倒絕壑無無坤維重林失蒼昊躋攀
寡儔侶扶接念輿阜俛仰慄嵌空無因掇靈草梯一作

窮聞戍鼓魂續賴邱禱敞豁天地歸縈紆村落好悠悠

思蔣徑擾擾愧商皓馳想永嘉侯應傷此懷抱

種蘭

種蘭幽谷底四遠聞馨香春風長養深枝葉趁人長智
水潤其根仁鋤護其芳蒿藜不生地惡鳥弓已藏椒桂
夾四隅茅茨居中央左隣桃花塢右接蓮子塘一月薰
手足兩月薰衣裳三月薰肌膚四月薰心腸幽人飢如
何採蘭充餽糧幽人渴如何醞蘭爲酒漿地無青苗租
白日如散王一作義皇不當仙人藥端坐紅霞房日夕望美

人佩花正煌煌美人久不來
佩花徒生光刈穫及歲蕤
無令見雪霜清芬信神鬼
一葉豈可忘舉頭愧青天
鼓腹詠時康下有賢公卿
上有聖明王無階荅風雨
願獻蘭一筐

草木言

何生我蒼蒼何育我黃黃
草木無知識幸君同三光
始自受姓名歲蕤立衣一作表
裳山河既分麗齊首乳青陽
甘辛各有榮好醜不相防
常憂刀斧劫竊慕仁壽鄉願

天雨無暴顧地風無狂雨足因衰憊風多因天傷在山
不爲桂徒辱君高岡在水不爲蓮徒占君深塘勿輕培
塿阜或有奇棟梁勿輕蒙朧澤或有奇馨香涓毫可鹿
差朝菌壽爲長擁腫若無取大椿命爲傷婆娑不材生
冉冉向秋荒幸遭薰風日有得皆簸揚所愧雨露恩願
效幽微芳希君頻採擇勿使枯雪霜

題僧院紫竹

喜遊蛟井寺復見炎州竹杳靄萬丈間嘯風清獨速江

南正霜霰吐秀弄顙頊似瑞驚堅貞如魔試金粟笋非
孝子泣文異湘靈哭金碧誰與鄰蕭森自成族新聞赤
帝種子落毛人谷遠祖賜鷦鷯遺芳遍南陸對煙蘇麻
醜夾澗竇當伏美譽動丹青環姿艷秦蜀因緣鹿苑識
想像虵丘劖幾葉別黃茅何年依白足龍樹蟄一花砌
瑤掃雲屋色靜曼仙花名高給孤獨青蔥太子樹灑落
觀音目法雨每霑濡玉臺時照燭離居鸞節變住冷金
顏縮豈念葛陂榮幸無祖父辱光搖水精串影送蓮花

軸江驚日相尋野鶚時寄宿幽香入茶竈靜翠直碁局
宵羨垣上蒿自多籬下菊從來道生一況伴龜藏六棲
託詎星迴檀欒已雲矗霞杯傳縹葉羽管吹紫玉久絕
一作無 釣竿歌聊裁竹枝曲媿生黃金地千秋爲師綠

早發始興

雲裏山已曙舟中火初熱綠浦待行橈元猿催落月沿
流信多美況復秋風發挂席借前期晨雞莫嘲啗

寄元孚道人

梵宇

一作楚寺

章句客佩蘭三十年長乘碧雲馬時策

一作借

翰林鞭羃事五岳遊金衣曳祥煙高攀桐君手左倚鸞
驚肩哭玉秋雨中摘星春風前橫輶截洪偃憑几見廣

宣爾來寤華胥石壁孤雲眠龍降始得

一作聽

偈龜老方

巢蓮內殿無文僧騶虞誰能牽因之問楚水弔屈幾潺
湲

和西江

一作江南

李助副使早登開元寺閣

第十五句缺一

字

虛豁登寶閣三休極層構獨立天地間煙雲滿襟袖
鰲荒初落日劍野呈綺繡秋檻祝融微陰軒九江湊拂簷
皇姑舍錯落白榆秀倚砌天竺祠蛟龍蟠古甃脩然觀
六合一指齊宇宙書劍忽若闕青雲日方畫南朝空蒼

莽楚澤稀耕耨萬事溺顏波一航安可沒徒云寄麟泣

六五終難就資斧念餘生湖光隱圭竇早聞羣黃鶴飄
舉此江岫陵谷空靄然人樵已鷁鷺燕宮豸冠客憑覽

發清奏珠玉難嗣音從

一作

輟輟愧孤陋

將歸鍾陵留贈南海李尚書

楚國有田舍炎州長夢歸懷恩似秋燕屢遶玉堂飛越
酒豈不甘海魚寧無肥山裘醉歌舞事與初心違曄曄
文昌公英靈世間稀長江浩無際龍蜃皆歸依賤子感
一言草茅發光輝從來雞鳧質得假鳳皇威常欲討元
珠青雲報巍巍龍門竟多故雙淚別旂一作旂

宿島徑夷山舍

百里遵島徑蓬征信遭迴暝依漁樵宿似過一作過黃金

臺缺齧心未理寥寥夜援哀山深石牀冷海近腥氣來
主人意不淺屢獻流霞杯對月撫長劍愁襟紛莫開九
衢平如水胡爲涉崔嵬一飯未遑飽鵬圖信悠哉山濤
諶細君吾豈厭蓬萊明發又驅馬客思一裴回

避世翁

海上一蓑笠終年垂釣絲滄洲有深意冠蓋何由知直
鉤不營魚蝸室無妻兒渴飲寒泉水飢食紫朮一作芝
鶴髮披兩肩高懷如澄陂嘗聞仙老言云是古鵠夷石

竇閔雷雨金潭養蛟螭乘槎上玉津騎鹿遊峩嶺以人
爲語默與世爲雄雌茲焉乃磻溪豹變應須時自古隱
淪客無非王者師

冬夜吟

黑夜天寒愁散玉東皇海上張仙燭侯家歌舞按梨園
石氏賓寮醉金谷魯家襜褕閣披水雪花燈下甘垂翅
散帙高編折桂枝披紗密甃青雲地霜白溪松轉斜蓋
銅龍喚曙咽聲細八埏螻蟻厭寒栖早晚青旗引春帝

展轉城烏啼紫天

一作烟

瞳矇千騎衙樓前

西川座上聽金五雲唱歌

蜀王殿上華筵開五雲歌從天上來滿堂羅綺悄無語

喉音止

一作只

駐雲裴回管弦金石還依轉不隨歌出靈

和殿白雲飄飄

一作飄

席上聞貫珠歷歷聲中見舊樣釵

篋淺澹衣元和梳洗青黛眉低叢小鬢膩鬢髻

徒果切小貌剪

髮爲髻

碧牙鏤掌山參差曲終暫起更衣過還向南行座

頭坐低眉欲語謝貴侯檀臉雙雙淚穿破自言本是宮

中嬪武皇改號承恩新中丞御史不足比

中丞御史皆當時宮中歌

者水殿一聲愁殺人武皇鑄鼎登真籙嬪御蒙恩免幽

辱茂陵弓劍不得親嫁與卑官到西蜀卑官到官年未

周堂衡祿罷東西遊蜀江水急駐不得復此萍蓬二十

秋今朝得侍王侯宴不覺途中妾身賤願持卮酒更唱

歌歌是伊州第三遍唱著右丞征戍詞更聞閨

一作月明

添相思如今聲韻尚如在何況宮中年少時五雲處處

可憐許明朝道向哀中去須臾宴罷各東西雨散雲飛

莫知處

飛龍引

有熊之君好神仙
食霞鍊石三千年
一旦黃龍下九天
騎龍杳杳昇紫煙
萬姓攀髯墮地啼
呼弓劍飄寒水
紫鸞八九隨玉笙
金鏡空留照魑魅
羽幢繡褱銀漢秋
六宮望斷芙蓉愁
應龍下揮中園笑
泓泓水遶青苔洲
瑞風颯颯還一作還
天光淺瑤闕
戕戕橫露苑
沆瀣樓頭紫
鳳歌三株樹下青
牛飯鴻臚九闕相
玉皇鈞天樂引金

華郎散花童子鶴衣短投壺姹女蛾眉長彤庭侍宴瑤
池席老兔春高桂宮白蓬萊下國賜分珪阿母金桃容
小摘仙流萬緘蟲篆春三十六洞交風雲千年小兆一
蟬蛻丹臺職亞扶桑君金烏試浴青門水下界蜉蝣幾
迴死

謫仙詞

牧龍丈人病高

一作歌

秋羣童擊節星漢愁瑤臺鳳輦不

勝恨太古一聲龍白頭玉氣蘭光久摧折上清雞犬音

書絕蜺旌失手遠於天三島空雲對秋月人間磊磊浮
漚客鸞鷖蜻蜒飛自隔不應冠蓋逐黃埃長夢真君舊
恩澤

步虛引

一作仙人詞

小隱山人十洲客莓苔爲衣雙耳白青編爲我忽降書

一作隱身暮雨虹蜺

一作霞

一千尺赤城門閉

一作開

六丁直曉

日已燒

一作紅

東海色朝天半夜聞玉雞星斗離離礙龍

翼

一本後四句
另作一首

獨揺手

漢宮新燕矜蛾睂春臺豔妝蓮一枝迎春侍宴瑤華池
游龍七盤嬌欲飛冶袖鶯鶯拂朝曦摩煙裏雪金碧遺
愁鴻連翩蠶曳絲颯還明珠掌中移仙人龍鳳雲雨吹
朝哀暮愁引啞一作啞鴛鴦翡翠承宴私南山一笑君
無辭仙蛾泣月清露垂六宮燒燭愁風歔

空城雀

古城濛濛花覆水昔日住人今住鬼野雀荒臺遺子孫

千年飲啄枯桑根不隨海燕柏梁去應無玉環銜報恩
近村紅栗一作栗香壓枝噉噉黃口訴朝飢生來未見鳳
皇語欲飛常怕蜘蛛絲斷腸四隅天四絕清泉綠萬無
恐疑

雞鳴曲

雞聲春曉上林中一聲驚落蝦蟆宮二聲喚破枕邊夢
三聲行人煙海紅平旦慵將百雜語蓬鬆錦繡當陽處
媿君飲食長相呼爲君晝鳴下高樹

小笛弄

一作小弄

一尺玲瓏握中翠
僊娥月浦呼龍子
五夜流珠

一作珠 粲

一作渠

夢卿

一作鄉

九青鸞倚洪崖
醉丹穴飢兒笑風雨
媧

皇碧玉星星語
蛇蝎愁聞骨髓寒
江山恨老眠
秋霧綺
席鴛鴦冷朱翠
星流露泣誰驅使
江南一曲罷伶倫
芙蓉水殿春風起

將進酒

金尊莫倚青春健
齷齪浮生如走電
琴瑟盤傾從世珠

黃泥局瀉流年箭麻姑爪禿瞳子昏東皇肉角生魚鱗

靈鼈柱骨半枯朽驪龍德悔愁耕人周孔著龜久淪沒

黃蒿誰認賢愚骨兔苑詞才去不還蘭亭水石空明月

姮

一作巫

娥弄簫香雨

一作天女

收江濱迸瑟魚龍愁靈芝九

折楚蓮醉羶風一歎梁庭秋

一作座愁

醪亞

一作凸

蠻觥奉君

壽玉山三獻春紅透銀鴨金鵝言待誰隋家獄瀆皇家

有珊瑚座上凌香雲鳳臙龍炙猩猩脣芝蘭此日不傾

倒南山白石皆賢人文康調笑麒麟起一曲飛龍壽天

地

錢塘對酒曲

風天鴈悲西陵愁使君紅旗弄濤頭東海神魚騎未得
江天大笑閑悠悠嵯峨吳山莫誇碧河陽經年一宵白
南洲彩鳳爲君生古獄愁蛇待恩澤三清羽童來何遲
十二玉樓胡蝶飛炎荒翡翠九門去遼東白鶴無歸期
一作鴟夷公子休悲悄六鼇如鏡天始老一作曉尊前事
去月團圓琥珀無情憶蘓小

巫山高

玉峰青雲

一作翠聳

十二枝金母和雲賜瑤姬花宮磊砢楚

宮外

一作列

仙

一作仙客

八面星斗垂秀色無雙怨三峽春

風幾夢襄王獵青鸞不在嬾吹簫斑竹題詩寄江妾飄

飄絲散巴子天苔裳玉轡紅霞幡

一作鮮

歸時白帝掩青

瑣瓊枝草草遺

一作迷

湘煙

贈別離

碧玉飛天星墜地玉劍分風交合水楊柳聽歌莫向隅

雞鳴一石留髭醉蹄輪送客溝水東月娥揮手崦嵫峰
蠻天列嶂儼相待風官掃道迎遊龍天姥剪霞鋪曉空
滢滢大帝開明宮文鯨掉尾四海通分明瀑布收靈桐
山妖水魅騎旋風魘夢齧魂黃瘴中借君朗鑒入崆峒
靈光草照閒花紅

關山月

昔年嫖姚護羌月今照嫖姚雙鬢雪青塚曾無尺寸歸

錦書

一作囊多一作曾

寄窮荒骨百戰金瘡體沙磧鄉心一

片懸秋碧漢城

一作帝

應期啼

一作破鏡時胡塵萬里嬋娟

隔度磧衝雲朔風起邊笳欲晚生青珥隴上橫吹霜色

刀

一作色如刀

何年斷得匈奴臂

殿前生桂樹

僊娥玉宮秋夜明桂枝拂檻參差瓊香風下天漏丁丁

牛渚翠梁橫淺清羽帳不眠恨吹笙棲鳥

一作鳥

暗驚僊

子落步月繫雲隨金雀蕙樓涼簟翠波空銀縷香寒鳳

皇薄東海即為郎斟酌綺疏長懸七星杓

古鏡篇

紫皇玉鏡蟾蜍字
隨地千年光不死
發匣身沈古井寒
懸臺日照愁成水
海戶山窗幾梳綰
菱花開落何人見
野老曾耕太白星
神狐夜哭秋天片
下國青銅旋磨滅
迴驚萬影成枯骨
會待搏風雨沈寥
長恐莓苔蝕明月

自歸山

海嶽南歸遠
天門北望深
暫爲青瑣客
難換一作不替白雲
心富貴老閑事
猿猱思舊林
清平無樂志
一作道尊酒有

一作瑶琴

渡一作濟浙江

適越一輕艘
凌兢截鷺濤
曙光金海近
晴雪玉峰高
靜寇思投筆
傷時欲釣鰲
壯心殊未展
登涉漫勞勞

清源途中旅思

古木閩州道
驅羸落照間
投村一作林礙野水
問店隔荒

山身事幾時
了蓬飄何日
閑看花滯南
國鄉月十灣環

南海送韋七使君赴象州任

一鷄韋公子新恩頒郡符
島夷通荔浦龍節過蒼梧
地
理金城近天涯玉樹孤
聖朝朱紱貴從此展雄圖

送沈次魯南遊

一作盧垓石
送沈次魯

高

一作南

臺贈君別滿握軒轅風落日一揮手金鵝雲

一作

煙雨空鰲洲石梁外劍浦羅浮東茲興不可接
脩脩煙際鴻

南海石門戍懷古

漢家征百越落地喪貔貅
大野朱旗沒長江赤血流
鬼

神尋覆族宮廟變荒邱惟有朝臺月千年照戍樓

賦得池塘生春草

謝公遺詠處池水夾通津古往人何在年來草自春色
宜波際綠香異雨中新今日青青意空悲行路人

題居上人法華新院

浮名深般若方寺設蓮華鐘唄成僧國湖山稱法家一
塵多寶塔千佛大牛車能誘泥犁客超然識聚沙

送秦鍊師

紫府靜沈沈松軒思別吟

一作到琴

水流寧有意雲泛本無

心錦洞桃花遠青山竹葉深不因時賣藥何路更相尋

哭寶月三藏大禪師

五峰習聖罷乾竺化身歸帝子傳真印門人哭寶衣一
囊窮海沒三藏故園稀無復天花落悲風滿鐵圍

湓城贈別

楚岫青楓樹長隨送遠心九江春水濶三峽暮雲深氣
調桓伊笛才華蔡琰琴迢迢嫁湘漢誰不重黃金

贈別

海國一尺綺冰壺萬縷絲以君西攀桂贈此金蓮枝高
鳥思茂林窮魚樂滂池平生握中寶無使歲寒移

御定全唐詩卷七百四十五